

DECLARATION  
DE MESSIEURS LES  
CARDINAUX,  
ARCHEVESQUES, EVESQUES,  
ET AUTRES ECCLESIASTIQUES,

*Deputez en l'Assemblée Generale du Cler-  
gé de France, Tenue à Paris*

Touchant certains Libelles, faiçts contre le Roy  
& son Estat.

*Traduiçt du Latin, Par le Sieur PELLETIER.*



A PARIS,

Par ANTOINE ESTIENE, Imprimeur ordi-  
naire du Roy, ruë S. Iacques, à l'Oliuier  
de Rob. Estiene.

---

M. DC. XXVI.

*Avec Priuilege de sa Majesté.*

The first of these is the  
 fact that the paper is  
 of a very light color,  
 and the ink is of a  
 very dark color. This  
 is a very unusual  
 combination, and it  
 is very difficult to  
 find in any other  
 document. The second  
 fact is that the paper  
 is of a very fine  
 texture, and the ink  
 is of a very fine  
 texture. This is a  
 very unusual  
 combination, and it  
 is very difficult to  
 find in any other  
 document. The third  
 fact is that the paper  
 is of a very fine  
 texture, and the ink  
 is of a very fine  
 texture. This is a  
 very unusual  
 combination, and it  
 is very difficult to  
 find in any other  
 document.



DECLARATION  
DE MESSIEURS LES  
CARDINAUX,  
ARCHEVESQUES, EVESQUES,  
ET AUTRES ECCLESIASTIQUES,

*Deputez en l'Assemblée Generale du Cler-  
gé de France, Tenuë à Paris.*

Touchant certains Libelles, faiçts contre le Roy  
& son Estat.

*Traduit du Latin de Monsieur l'Evesque de Chartres:  
Par le Sieur PELLETIER.*



OMME nous deli-  
berions des affaires de  
nostre Ordre, en l'As-  
semblée Generale te-  
nuë à Paris, on nous  
fit voir vn Liure imprimé sans le nom  
de son Auteur; lequel estoit intitu-  
lé, *Admonition au Roy*: & qui décriant  
d'abord son Conseil, auoit pour but



principal, d'affoiblir son autorité, déprimer la Majesté, de jeter les Grands en meffiance, d'émonuoir les Peuples à sedition; & qui en fin conjuroit la ruine & l'embrasement de la France; comme fait aussi cét autre Libelle *des Mysteres d'Estat*, qui sort de mesme boutique. Et ayant jetté plusieurs fois les yeux sur ces ouurages, nous eusmes vn extrême déplaisir, de voir que la meschanceté des hommes fust montée à ce degré, que ceux qui ont cy-deuant trempé leurs mains parricides dans le sang de nos Roys, les mesmes exerçassent encores aujourd'huy leur style malin & pestilent contre la reputation & le salut de leur successeur. Comme nous remarquions aussi, que ce plaissant Exhortateur, sous vn faux pretexte de la Religion Catholique, entreprenoit contre la personne du Roy, & contre la

tranquillité de son Royaume, nous auons creu estre de nostre deuoir, de prendre soigneusemēt garde, que non seulement la vraye Religion ne se perdist pas, mais que cēt Auteur n'espandist son venin plus auāt, sous couleur d'une feinte & masquée pieté. Car encores que par les appas d'un beau discours, & qui semble estre fort modéré, il ne proteste que toute humilité, ne respire que charité, & face le Theologien, & l'amateur de paix; afin que sous ces belles apparences, il s'insinuē plus facilement dans les ames foibles & credules; Si est-ce que nous deuōs premieremēt aduertir les Peuples, qu'il est de ces Libelles la ne plus ne moins que des boētes des charlatans, qui ne promettent au dehors & en leur titre que des remedes salutaires, & n'y a au dedans que du poison. Qui ne l'eust aussi estimé Theologien par cette liberté?



Qui est-ce qui ne l'eust pris pour  
Compatriote, par cette feinte charité?  
Qui est-ce qui ne l'eust iugé pour amy,  
par cette affection simulée? Et qui en  
fin ne l'eust reputé pour subject du  
Roy, par ces belles paroles? Certes on  
y eust esté trompé, s'il ne se fust pas si  
ouuertement débordé en inuectiues  
contre sa Majesté; & si on n'eust reco-  
gneu qu'un subject ne pourroit pas  
estre si insolent, que de blasmer son  
Roy; ny qu'il y eust en l'amy, vne pas-  
sion si violente, qu'il fust des impreca-  
tions contre celuy qu'il affectionne; ny  
en un Citoyen, vne si cruelle perfidie,  
qu'il procurast la ruine de sa Patrie; ny  
en un Theologien, vne si effrontée  
impudence, qu'il voulust que tout ce  
qui regarde la paix & la guerre des  
Princes, & des Estats, fust rapporté à sa  
ceruelle; qu'il examinast les affaires,  
qu'il les approuuast, ou rejetast selon

son sens, & qu'en fin il voulust exercer son Empire sur les Roys mesmes.

C'EST pourquoy nous le tenons pour ennemy, & non pour amateur de la paix, pour trompette de sedition, pour vn perpetuel contempteur de la Majesté Royale, & qui iette des flambeaux parmy le Peuple; non pour faire des admonitiōs au Roy, mais afin qu'il trouble & embraze tout le Royaume: Chose à quoy nous nous deuons opposer, avec tant plus de verueur, qu'il nous faut prendre garde que rien ne s'imprime en l'esprit des François, qui sous le specieux pretexte d'une Religion simulée, se tourne à la ruine de la vraye pieté, au prejudice de la paix & de la tranquillité publique. Nous auōs déjà éprouué que c'est la coustume de tels perdus, que quand ils machinent quelque chose de sinistre cōtre l'Estat, ils sement auparauāt des feüilles de pa-



pier parmy les Peuples ; ne plus ne moins que le serpent par son sifflement nous aduerzit du venin qu'il prepare, auant que de blesser de son éguillon empoisonné. Et tout ainsi que le vent du Midy, souffle auant que de nous faire sentir l'air pestilent qu'il apporte ; & comme la Mer se joue de ses vagues, & se sent émouuoir peu à peu, auant qu'elle s'enfle & eleue impetueusement ses flots ; De mesme l'insolence de la langue & de la plume, precedent souuent la prise des armes ; Et apres auoir tenté la patience des Princes, par de fascheux discours, ils se iettent plus audacieusement dans la rebelliõ. Pourtant, afin que les ennemis de la France recognoissent combié sont vains leurs efforts, quand ils taschent d'estonner le courage inuincible du Roy, & de corrompre la fidelité de son Peuple ; Nous auons trouué bon, par l'ynani-

me



me consentement de l'Assemblée, de  
declarer quelle est nostre opinion tou-  
chant telles impostures : & de mon-  
strer aussi quel iugement les autres en  
doiuvent faire. Et afin que cela se puif-  
se accomplir tant plus facilement, il ne  
sera pas hors de propos, de représenter  
en peu de paroles, quel est le dessein de  
cét homme-la, & de faire voir où tend  
sa belle admonition. Premièrement, a-  
fin qu'il surprenne l'oreille du Lecteur,  
il se dit estre de mesme pais, Theolo-  
gien, & ennemy de la guerre: Puis apres  
il s' imagine des dangers ineuitables, &  
est insolent iusques là, de nous mena-  
cer de tragicques euenements. Son au-  
dace croissant de plus en plus, il accuse  
d'iniustice les armes du Roy ; ses al-  
liances, d'impieté, son Conseil, de per-  
fidie ; & les Grands du Royaume, de  
crime de leze-Majesté. Apres qu'il a  
vomý son venin contre nous, il se

prend aux Estrangers: Il accuse le Senat de Venise d'Atheïsme, le Duc de Sauoye de legereté & d'auarice: Il nous rend tous les autres Alliez suspects; & semble qu'il veuille estre le Censeur de tout le mōde. Aussi par la liberté qu'il se donne de médire, & se débordant dauantage, il nous attaque encore: Il attribüe à la France la guerre que les Caluinistes ont faicte en Allemagne contre les Lutheriens, & se mōstre impudent iusques là, qu'il voudroit faire croire que le Roy combat pour l'aduancement du regne de Satan. En fin, ô parricide execrable! i'ay horreur de dire qu'il menace le Roy de damnation eternelle: Prince qui est si Clement, si Iuste, si zelé à la Religion: & comme s'il estoit blasnable de ce que selon le droict des Gents, il assiste ses Alliez à leur besoin, preste la main à ceux qui sont opprimez, assiegez, exi-



lez, & en extreme affliction. Ce sont là les armes principales dont il attaque le Roy & le Royaume: Ce sont là les iniures & les inuectives dont il persecute l'estat du Roy Tres.Chrestien, & les Princes Catholiques. Il eust esté peut-estre plus à propos de les mespriser, que de leur opposer le Bouclier de la verité, si le silence n'eust esté reputé pour vne tacite approbatiõ du mal. Et parce qu'il se sert principalement du pretexte de la Religion, comme d'un piege, afin de faire mespriser par cét artifice, la Majesté du Souuerain, il est raisonnable que nous declarions, sans fard, sans adulation & médifance, ce que la Religion enseigne, touchant l'autorité des Rois.

IL est donc à sçauoir, qu'outre l'universel consentement des Peuples & des nations, les Prophetes annoncent, les Apostres confirment, & les Mar-

.. *Declaration du Clergé,*  
tyrs confessent, que les Roys sont ordonnez de Dieu, & non cela seulemēt, mais qu'eux-mesmes sont dieux. Chose qu'on ne peut pas dire auoir esté inventée par la servile flatterie & complaisance des Payens ; mais la verité mesme le monstre si clairemēt en l'Escripture Saincte, que personne ne le peut nier sans blasphemē, ny en douter sans sacrilege. Pourtant ils'ensuit, que ceux qui sont appelez Dieux, le soiēt, non par Essence, mais par participation ; non par nature, mais par grace ; non pour tousiours, mais pour certain temps ; comme estants les vrayes Lieutenants du Dieu tout Puissant ; & qui par l'imitation de sa divine Majesté, representent icy bas son Image. Il n'y a aussi nul pour lourd & stupide esprit qu'il puisse auoir, qui voyant celuy qui d'un clin d'œil range tant de milliers d'hommes en bataille, qui a tant de



maines qui tirent l'espée hors du fourreau quand il se veut venger d'une offense, ou qui l'y remettent lors qu'il la veut pardonner; qui seul peut ennoblir les personnes de basse qualité, qui remplit de biens les necessiteux, qui rappelle les Exilez en leur pais, qui sert de refuge aux affligez, qui comble de felicité ceux que bon luy semble, & qui en fin a en sa puissance la fortune, la vie & la mort d'un chacun: Il n'y a nul, dy-je, qui n'estime & ne croye, celuy la ne tenir rien du mortel, mais plustost qu'il approche fort de la Deïté, ou qu'il luy est semblable. Car ceux à qui Dieu a communiqué sa Puissance, il leur a faiët part de sa Majesté, qui est la plus salutaire garde de l'Estat: afin qu'ils ne contraignent pas leurs subjects de leur obeïr par la terreur, mais qu'ils les contiennent doucement en deuoir, par la reuerence de cette di-

*Declaration du Clergé,*  
uine Majesté graüée sur leur front.

CAR il n'y a rien qui ayde tant à la felicité d'un chacun, ny rien de si vtile au repos public, que quand les subjets obeissent volontairement à leurs Superieurs & Magistrats ; puis que la diuine prouidence leur a imposé la necessité d'obeir : Aussi la nature n'a pas seulement imprimé en l'esprit des hommes, mais c'est comme chose née avec tous les animaux, de suiure ceux qui les conduisent, & qui marchent deuant eux ; d'obeir & de veiller soigneusement pour la garde & conseruation de leurs Rois. Les Abeilles reuerent le leur dans les Ruches ; aux champs, elles se tiennent toutes à l'entour de luy : quand il vole, elles ne le quittent point ; s'il est debile, elles le soustiennent ; s'il est malade, elles l'assistent ; s'il n'en peut plus, elles le portent sur leurs espaulles ; s'il



est en peril, elles le protegent aux despens de leur vie. Les loix de la nature sont donc si fortes & si puissantes, que ce que les hommes font par mutuel consentement, cela mesme nous voyons pratiqué entre les animaux: Car si nous recherchons les exemples & les conseils de tous ceux qui par leur prudence & autorité se sont rendus celebres à bien ordonner des affaires publiques; certes nous trouverons qu'il n'y a rien qui approche tant du droict de la Nature, que le commandement; sans lequel vne maison particuliere, ny vne Cité, ny vn Peuple, ny tout le genre humain, ne pourroit subsister, non pas mesme le monde, ny tout l'estre des choses; l'obeir & le commander n'estant pas moins nécessaires l'un que l'autre: Aussi la principale vertu, ou plustost toute la force du commandement,

depend du consentement de ceux qui obeissent. S'il estoit loisible aux subiets d'examiner ce que les Princes ordonnent, quelle seroit l'autorité des Magistrats ? S'ils n'approuuoient ce qu'ils trouuent bon, quelle seroit leur puissance ? S'ils condamnoient leurs deliberations, quelle seurté y auroit-il aux affaires publiques ? Les seruiteurs se banderoient contre leurs Maistres, les esclaves contre leurs Seigneurs, les enfants contre leurs peres, & tout l'ordre & toute la discipline de l'Estat politique, se renuerseroit : les maisons particulieres seroient remplies de discorde, les Villes de sedition, les Prouinces de brigandage, & tout periroit en fin, par tumulte & confusion : Le droict des gens se renuerseroit, & toutes choses retourneroient à leur ancien Chaos, si le plus grand nombre secoüoit le  
joug



joug du moindre , & qu'il voulust tout faire à sa fantaisie. Comment se pourroit-on aussi promettre, que celuy-la peust bien commander, qui n'auroit pas appris d'obeir sagement?

P O U R T A N T ce que la loy humaine ne permet pas, la diuine le defend aussi ; quand elles prohibent toutes deux aux seruiteurs d'vser de fraude enuers leurs maistres , & de leur estre desobeissants. Mais quoy, si les Princes sont meschants? A Dieu ne plaise que nous approuuions l'insolence, la fierté, ny l'iniustice d'aucun : Si tu t'en rapporte toutesfois à la Sainte Escriture , tu trouueras qu'il ne nous est loisible en façon quelconque, de nous rebeller ; mais il nous est commandé d'obeir, où il n'y va point de l'interest de la Religion. Encore qu'un Prince rauisse nos biens, qu'il nous oste nostre liberté,

qu'il nous surcharge, & qu'il nous face tout le mal que Dieu denonçoit à ceux qui luy demanderent vn Roy; nonobstant tout cela, il faut obeir au Prince pour fascheux qu'il puisse estre : Car Dieu l'a institué, & ne faut desobeir à son maistre, pour mauuais qu'il soit ; par ce que Dieu preuoyant bien qu'il deuoit estre tel, il l'a neantmoins estably pour nous commander.

Si Dieu nous a donc donné vn bon Roy, nous le deuons aymer : s'il est autre, la Majesté Diuine nous ordonne de le souffrir : Et s'il persecute la Religion ( quoy que les Heretiques dient le contraire ) s'il a les armes à la main, s'il expose les fidesles au Martyre ; Neantmoins si nous voulons obeir à l'Escripture, il vaut mieux remporter vne couronne celeste par l'effusion de nostre sang,



que de souiller la renommée de la patience des Chrestiens, en luy résistant l'espée au poing: & nul ne peut aussi improuver cette opinion, qu'à mesme temps il n'improuve le precepte & l'exemple de nostre Seigneur; qu'il n'oste aux Martyrs, la gloire de leur modestie, se pouuants rebeller; & qu'il ne reproche la lascheté de l'Eglise naissante, laquelle encore qu'elle fust plus forte en nombre, n'a pas pour cela arraché de la main des Empereurs, les armes dont ils la persectoient cruellement. Aussi telle rebellion n'est propre qu'aux Heretiques, & non aux Catholiques. Ceux-la pour la moindre crainte de la Religion, courent aux armes, foulent les Loix aux pieds, violent tous droicts, & résistent par quelque voye que ce soit, à la puissance ordonnée de Dieu.

ON ſçait que Ieſus Chriſt eſtant né au monde, & meſme dés ſon berceau, ſe porta à l'obeiſſance de l'Edict de l'Empereur, & ne refuſa point d'obeir à celuy à qui il auoit donné l'autorité de commander : Il n'eut point de honte d'eſtre accuſé deuant le Preteur, encore qu'il fuſt innocent : Il ſe ſouſmit à ſon iugement, tout inique qu'il eſtoit : Il ne reſiſta ny à la violence qu'on exerça contre luy, ny à la Croix qu'on luy preſenta, ny à la mort, encore qu'il euſt en ſon pouuoir vn million d'Angeſ pour l'aſſiſter ; & encore qu'il viſt, qu'en ſa condamnation, celle de tous les Chreſtiens y fuſt comprise. Qu'on liſe toutes les hiſtoires de l'antiquité, on trouuera vne ſemblable conſtance à ſes Diſciples & aux Martyrs. Et quand la foy Catholique ſe fuſt eſtendue auſſi loing que l'Empire Romain,



les Fidelles témoignoient leur creance & leur patience, entre les mains des bourreaux, parmy le fer, au milieu des flammes, & lors qu'on les exposoit pour estre deuorez par les bestes sauuages. Toutesfois se voyants entre vne si iuste cause & vn si cruel traitement, ils ne recouroient pas aux armes, encore que les prenans, ils eussent peu estre égaux en nombre, & plus forts par leur vertu; veu qu'ils pouuoient remplir les Villes, les Isles, les Communautéz, le Senat, & les Palais; Ils couroient neantmoins, comme i'ay dit, à cette couronne celeste, par les supplices & par les tourments.

QV E ceux-la cherchent donc des loix ailleurs, qu'en la discipline Chrestienne, lesquels estiment qu'il vaut mieux se rebeller, que d'obeir. Quel nouveau droict leur est reuelé du Ciel,

qui leur face croire qu'il leur est licite, ce qui n'a pas esté permis aux Apostres & Martyrs? Cela sera-t'il loisible, la Foy s'estant espandue par tout, qui n'a pas esté permis en sa naissance & en son adolescence? La Chrestienté n'est pas autre qu'elle estoit lors, il n'y a pas vn autre Euangile, ny vn autre Iesus Christ: Quiconque croit autrement, change la Foy en faction; & par trop croire à autrui, il cherche sa gloire & sa conduite en soy mesme.

C E n'est pas toutesfois que nous voulions establir vne iniuste domination en faueur des Rois: Chose d'où nous sommes aussi éloignez, que nous auons à craindre qu'elle aduienne: Mais nous ne dénions pas le témoignage iustement deu, & qu'il est nécessaire de rendre à la Religion, au Roy, & à la verité: Nous declaronz aussi tant plus librement nostre opi-



nion de ce que nous croyons , que nous n'ignorons pas sous quel Roy nous viuons : Car nous n'auons pas si peu de soin de ce qui nous touche, que nous ne scachions combien il honore la Religion : Ny ne sommes pas si ingrats , que nous voulions reuoquer en doute , qu'il ne prefere à son sceptre , vne Pieté pure & sincere.

D'o v il s'ensuit , qu'un chacun estant obligé de reuerer , d'aimer , & d'embrasser le gouuernement de l'Estat sous lequel il est né , il doit tascher de tout son pouuoir , non seulement de le defendre , mais aussi de l'accroistre , veu que Dieu l'a ainsi institué & ordonné ; Tant s'en faut que ceux qui sont plus Catholiques d'effect que d'apparence , doiuent interpreter selon leur fantaisie les paroles , les actions , & la pensée meime

des Rois, comme s'ils tenoient à la main la Verge de Censeur; Au contraire, ils sont tenus de desirer la prospérité des affaires, & les mettre en reputation. Car puis qu'il est tout constant, que l'assistance de la Divine bonté, est plus favorable aux Princes qu'aux particuliers; ceux-là n'offensent pas moins Dieu, qui luy ostent la puissance de iuger les Rois; laquelle il s'est reseruée à luy seul; qu'ils sont iniurieux envers les Rois mesmes, qui sont sujets à son seul iugement. C'est pourquoy David souillé d'adultere & de meurtre, ne reconnoissoit d'avoir péché qu'envers Dieu seul, parce qu'il estoit Roy, & n'en craignoit point d'autre: & comme Roy, il n'estoit sujet à aucunes Loix; d'autant que les Rois sont exempts de la punition des crimes, n'y n'encourent les peines portées par les Loix,

*S. Ambr.  
sur le  
Pseau. 50.*



Loix ; par ce qu'ils font à couuert sous la Majesté de leur Empire. Celuy-la n'estimoit donc pas auoir peché enuers l'homme , qui ne luy estoit en rien sujet. Car qui peut dire à vn Roy , pourquoy fais-tu ainsi cela ? Toutesfois cét insigne Calomnieur, trenchant du Theologien, réprend tant plus insolemment, au mespris du Roy : il resoult magistralement, il afferme audacieusement, il prouue frauduleusement, il calomnie ouuertement , & conclud diaboliquement.

OR comme c'est chose tres-heureuse en la Souueraineté , de ce qu'on ne peut estre contraint à rien ; c'est bien toutesfois chose plus grande, que le Prince soit Arbitre de la paix & de la guerre: C'est aussi à luy de choisir la Loy : & comme il luy est donné du

Ciel de iuger de toutes choses, la gloire de l'obeissance est reseruée à ses subjects: Car en la police ciuile, comme en toutes les autres professions, il faut qu'il y ayt vn principe, duquel tout le reste dépende & prenne son mouuement. Et si par vn consentement vniuersel, on ne se tenoit appuyé sur ces bases, la verité ne pourroit estre recogneuë d'auec la fausseté, & on ne pourroit non plus bien conuenir d'aucune dispute: comme il faut aussi qu'aux choses qui ont à estre conseruées en vnité, il y ayt vne regle certaine; à laquelle toutes les autres se rapportent, afin que l'ordre y soit estably & la confusion reiettée. Car la naturelle police des hommes, qui est la plus propre à la paix, requiert que l'autorité de faire la guerre, dépende des Princes, qui non seu-



lement n'ayent nuls obstacles , mais qui maistres de toutes choses , les attirerent à leurs Conseils , & ne dépendent pas de ceux d'autrui. De controller aussi leurs resolutions , c'est temerité ; de les découvrir , c'est perfidie ; de les reprendre , c'est vne rebellion insupportable ; par ce que la force & la grandeur de l'Estat ne peuuent subsister , que lors que toutes choses se rapportent à vn seul. Car tout ainsi que les odeurs aromatiques perdent leur force , si elles sont exposées au grand air ; De mesme si les Conseils des Rois , que les Hebrieux appellent, Mysteres, sont manifestez au peuple ; de cela seul qu'ils sont publiez , ils ne sont plus ce qu'ils estoient auparavant. C'est pourquoy Salomon le plus Sage des Rois , aduertit les Princes de ne boire pas beaucoup de vin,

28      *Declaration du Clergé,*  
de peur que ce qui a esté prudemment  
arresté en leur Conseil, ne soit décou-  
uert à table en l'excès de la bonne  
chere. On lit que les Empereurs Ro-  
mains, faisoient grauer vn Sphinx en  
leur cachet, & portoient vn Mino-  
taure en leurs enseignes, pour déno-  
ter que les Conseils de la paix & de la  
guerre, doiuent estre secrets. Et en-  
core que les cœurs des Rois ne se puis-  
sent sonder, & qu'on doit priuer de  
tout honneur celuy qui veut penetrer  
au dedans; toutesfois cét homme in-  
epte, qui n'aime que ce qu'il luy plaist,  
& auquel, comme Estranger, nul se-  
cret ne deuroit estre decouvert, per-  
dant neantmoins toute honte & re-  
uerence, se iette dans le Conseil du  
Roy : Il baptise du nom de crime,  
l'Alliance que sa Majesté a faite avec  
les Venitiens & Monsieur de Sauoye.



Il appelle brigandage, le secours qu'elle fait aux Grisons contre ceux de la Valtoline : Il appelle crime , qui ne se peut effacer , la confederation faite avec les autres Princes , pour refrener l'iniuste domination de quelques vns. A toutes lesquelles choses , il ne faudroit répondre qu'un mot : C'est que le Roy a fait l'Alliance , parce qu'il l'a voulu : qu'il a entrepris la guerre , parce qu'il estoit iuste & raisonnable ; ou pour mieux dire , qu'une telle guerre est iuste , parce qu'il l'a entreprise. C'est certes ce qu'il faudroit répondre , si nous n'auions dessein de decouvrir un peu plus apertement la meschanceté du Personnage , & faire voir quelle est l'équité du Roy.

Q V' E S T - ce qu'on peut iustement blasmer & reprendre en la Republique de Venise ? Sera-ce la Foy & la

Religion? Elle est Catholique. Sera-ce l'Alliance? Il y a tant de siècles qu'elle est faicte, à nostre bien & au repos de toute la Chrestienté. Il reproche d'un costé l'Atheïsme à cét auguste Senat, qui est comme le Temple d'une vraye Pieté; & d'autre part, il controuue des débats & dissensions entr'eux; la meilleure partie, comme il luy semble, estant vaincuë & emportée par le plus grand nombre. Bref, il eust ietté la pomme de discorde parmy eux, s'il eust eu affaire à de simples femmes.

QVANT à ce qu'il trouue à redire à l'Alliance de Sauoye, ie ne sçay pas ce qu'il peut controuuer là dessus. Quelle iniustice y a-t'il, si nous assistons comme nous deuons, vn voisin, vn frere, vn ancien amy, contre les Genoïs deserteurs de la France, &



qui ont mesme appellé les Lutheriens à leurs secours? Seroit-il bien raisonnable, que tant de Peuples qui ont toute l'esperance de leur salut en la protection du Roy, comme en vn tresfort rempart, & en la foy duquel, comme en vn port salutaire durant ces orages, ils mettent à couuert leurs vies & leurs fortunes: Seroit-il raisonnable, dy-ie, que le Roy desarmé, sans agir, & les bras croisez, contemplast le tort qu'on fait à ses voisins, qu'il vist leurs droicts violez, qu'il les vist battus, attaquez, & qu'il considerast au mal d'autruy, sa propre ruine? Voir des Villes saccagées, voir des fenestres du Louure, le pais de nos voisins tout en feu, oüyr le fracas de leurs maisons, entendre les cris lamentables des femmes, & les gemissements de ceux qui perissent:

Que nous voyons couler le sang de nos Alliez sur le bord de nos riuieres; Que nous ayons l'ennemy à nos portes, & qu'il abuse de nostre patience; Tout cela estant, dy-ie, demeurerons nous sans rien faire, & sans nous soucier, ny de la conseruation de nos Alliez, ny de nostre propre peril? Ne nous fera-t'il pas permis de nous remüer, & de leuer la main, pour empescher que les auteurs d'une si pestilente Theologie, ne declament contre nous?

TOUCHANT le faict de la Valtoline, il est certain que le Roy ayant les armes à la main, pour chastier la faction des Heretiques en Guyenne; & ne soustenant pas moins lors la cause de l'Eglise Catholique; qu'il taschoit d'affermir son Estat; Ceux de la Valtoline se rebellerent  
contre



contre les Grisons leurs Souuerains, & trouuerent les armes des Estrangers, fauorables à vne si horrible reuolte. Sur cela les Grisons implorant le secours de sa Majesté, en consideration de l'Alliance qu'ils ont de si long temps avec la France. Qui a-t'il eu de plus iuste que d'assister des Alliez en leur affliction, contre des subiects rebelles, & lors qu'ils couroient fortune de perdre leur Souueraineté avec la Vie ? Et l'affaire en estant venue à ce poinct-la, que le Roy ne voulant blesser sa Conscience, ny déplaire à celuy qu'il honore comme son pere, fist solennellement assembler les plus Notables des trois Ordres du Royaume : Et choisissant les plus remarquables de nostre Assemblée, soit pour leur fidelité enuers sa Maje-

sté , ou pour leur zele à la Religion , les pria de luy donner aduis de ce qu'il auoit à resoudre sans scrupule , sur le faict de la Valtoline : Là fut arresté , que non seulement il pouuoit , mais qu'il estoit obligé d'assister les Grisons ses Alliez & Confederez , contre les rebelles de la Valtoline.

P O U R Q U O Y est-ce donc qu'on broüille ainsi le Ciel avec la Terre ? Pourquoy est-ce qu'on vse de menace , & qu'on vomit tant d'iniures contre sa Majesté , comme si les esprits s'estoient dépouillez de toute pudeur & reuerence , par ce qu'elle faict vne Alliance avec les Princes Caluinistes , & ce au mesme temps que quelques Princes Catholiques ses ennemis , se sont confederez avec les Lutheriens ? Et nous veu-



lent-ils aussi rendre, le Roy & le Royaume odieux, pour la Paix, plutôt que pour alliance que nous auons faite avec le Turc? Certes nous-nous rangerions tout à fait à leur opinion, si l'Alliance contractée avec les Estrangers, estoit faite à autre fin, sinon que les pays des Princes opprimés, misérables & exilés, leurs fussent rendus & conseruez, les tenant comme ils font, de la main de Dieu; & non que l'ambition de quelques-vns, que la trop grande felicité rend auides, leur fist vsurper le bien d'autrui. Nous nous accorderions, dy-ie, librement avec eux, si l'Alliance estoit faite au détriment de la foy Catholique, & à l'aduantage de l'heresie. Or de penser que ce soit l'intention du Roy; cela est si éloigné de la Verité, qu'on

n'en a pas mesme le moindre soupçon. Combien voudroient qu'il leur eust cousté, que cela fust, ceux qu'il tient depuis long temps si pressés, de forts, de garnisons; & qui tous couverts de playes & de calamitez, par Mer & par Terre combattent aujourd'huy contre la faim? Mais pour destruire ceste opinion temeraire, pour ne dire pas heretique; & laquelle ne sert pas tant à conseruer les Catholiques, qu'à exciter les Heretiques à rebellion, en ce qu'ils tiennent qu'il ne faut pas s'allier d'un Prince, qui est de contraire Religion à la leur; Ne prouue-t'on pas toutesfois par les témoignages de l'Ecriture, que les Princes quoy qu'infidelles, & par consequent Heretiques, sont vrayes Princes legitimes? Et que pourtant on



peut contracter Alliance & amitié avec eux, comme avec Princes Souverains ? Certes Abraham se confedera avec Abimelech, & pour luy & pour les siens, encor qu'il fust infidele : Loth s'estant allié avec les Roys de Sodome, se seruit de leurs forces & de leurs Conseils : Iacob souhaitta de se confederer, & mesme de s'allier avec Laban, Idolatre : Heber en fit autant avec l'infidelle Iabin : comme aussi Daud & Salomon, avec les Roys d'Egypte, & de Tyr : Les Macchabées s'vnirent avec les Romains & les Lacedæmoniens : & toutesfois cela n'est pas blasmé en la Parole de Dieu. Mais Iosaphat, l'exemple duquel ils apportent, est voirement repris, de ce que s'estant rallié avec des Princes infidelles, il auoit entrepris vne guer-

re iniuste , encor qu'elle fust contre des mescreans ; d'où nous recueillons, que ce ne fust pas l'Alliance qui fut blasmée, mais bien l'iniustice de ses armes. Et on ne luy a pas imputé à crime, de ce qu'il se ioignit contre les Moabites, avec Ioram ce meschant Prince, & ennemy iuré de Dieu. Il faut donc nécessairement, que ceux à qui l'Alliance avec les Heretiques, n'aggrée pas, blasment tant de Patriarches, & de Prophetes, voire même quelques Papes, la Saincteté desquels est par dessus toute calomnie; la Foy, hors de soupçon & de peril de faillir : les Papes, dy-ie, qui ont quelquefois fait la Paix, & se sont associés avec des Infidelles, les affaires de la Chrestienté le portant ainsi. Il faudroit encore qu'ils blasmassent Iesus Christ



mesme , de ce qu'il épandoit les semences de la Verité , parmy les delices du festin , & parmy la douce odeur des parfums , se mettant à table avec les pecheurs & Publicains. Aussi lors que les Chrestiens gémissoient sous la cruauté des Empeurs ; si plusieurs d'eux n'espargnoient pas la force de leurs bras pour leur acquérir des Victoires, ils n'eussent non-plus fuy le Martyre sous eux mesmes , s'il l'eust fallu souffrir pour la Religion. Les Romains combattoient contre les Parthes, les Chrestiens contre les Chrestiens , & sous vn Chef ennemy du nom Chrestien : car ils sçauoient quelle difference il y a entre la Religion & l'Estat , & n'estimoient pas desplaire à nostre Seigneur Iesus Christ, s'ils rendoient aux Empe-

reurs ce que luy mesme auoit ordonné de leur deferer. Et ainsi Valentinian s'allia avec les Gots, & Theodoze avec les Arriens. Constantin, grand de nom, & encor plus auguste par sa Religion, ne cassa point en son Armée les Soldats Payens, il ne les rebutta point de son Conseil, & ne les rejetta non plus du Senat. Il n'espargna nulle sorte de dépense pour les Ceremonies Romaines, encor qu'il les désapprouuast: & se voulant en toute façon rendre agreable au Senat, il le voyoit de bon œil, comme aussi les Temples; & consideroit volontiers les Noms des Dieux écrits sur leurs frontispices, s'informoit de leur origine: & encore qu'il fust ennemy d'une Religion impie, il ne rejettoit pas la familiarité, l'Alliance  
& le



& le Conseil des Payens infidelles.

SI doncques à l'imitation de tant de Saints Personnages , l'Alliance avec les infidelles , est permise ; certes celle que la France a renouuellée avec l'Angleterre , & qui est depuis si longues années , est grandement loüable : quand ce ne seroit , qu'en consideration d'icelle , les Catholiques de ce Pays-la , & qui estoient fort opprimés auparavant, sont aujourd'huy traittez beaucoup plus gracieusement. Car pour ne parler point des Hollandois, l'Alliance desquels a esté faite par des Roys si sages & si prudents, au grand bien de la France ; qui est celuy-la qui soit si ignorant de nos affaires, ou de celles de toute l'Europe , qui puisse reuoquer en doute , que le Mariage d'Angleterre , ayt esté fait à autre

dessein , que pour fauoriser le rappel des Catholiques , qui estoient hors de leur Pays, & qui y estants retournerez, peuuent iouïr d'un plus libre exercice de leur Religion? Mais afin que nous accordions quelque chose à nos ennemis, figurons-nous que cela ait esté seulement fait par raison d'Estat (laquelle n'est pas de peu d'importance dans vn Royau-me) plustost que par aucun respect de Religion; qui touche neantmoins fort le cœur du Roy, au témoignage mesme de ses propres ennemis; On ne peut routesfois blasmer ny improuuer, ce qui est confirmé par tous les exemples quē nous auons apportez. Quel tort font donc à la Religion, ceux qui n'estiment pas la pouuoir conseruer , sinon en renuersant l'autorité Royale & le droict



des Gents? La Religion croirdt se pouuoir soustenir assez puissamment par ses propres forces, lesquelles sont aussi les meilleures: Car celle qui adore vne seule verité, n'a point besoin de mensonges, ny d'artifices. S'il a donc esté permis aux Chrestiens, d'auoir des Chefs de guerre infidelles contre les Chrestiens mesme, pourquoy ne leur sera t'il loisible de s'allier avec les Heretiques, contre leurs ennemis?

ON dit sur cela, que la guerre que le Roy entreprend, est iniuste, parce qu'il n'a point de iurisdiction sur l'Empereur; Et que pourtant il n'a non-plus de pouuoir sur sa Vie, qu'il n'a d'autorité de rétablir le Prince Palatin en son Estat. O insensé & insipide Theologien! Si le Roy est en querelle avec l'Empe-

44      *Declaration du Clergé,*  
reur, & s'il assiste ses Alliez, à armes  
ouuertes, cela ne se pourra-t'il ap-  
peller guerre, par ce que l'Empe-  
reur ne releue pas de sa Majesté? Car  
s'il estoit son sujet, ce ne feroit pas  
tant guerre, qu'un chastiment qu'il  
exerceroit contre luy. Mais ceste  
guerre-la ne semble pas iuste, par  
ce qu'on l'entreprend pour reſtablir  
vn Prince Heretique, ou meſme in-  
fidelle, ſi tu veux. Or il n'importe  
pour eſtre tel : Nous ne l'approu-  
uons pas comme infidelle, mais on  
le ſouſtient comme Prince legitime.  
S'il eſt Heretique, il eſt neantmoins  
ordonné de Dieu, de la main duquel  
toute puissance eſt donnée. Nous  
l'auons en horreur comme Hereti-  
que, mais nous le protegeons com-  
me Prince que Dieu a inſtitué, &  
taſchons de le reſtablir en ſes Pays.



La France reçoit en son sein celuy qui se refugie vers elle , & fauorise vn Prince chassé de sa maison , qui implore nostre secours : & ce qui est encore digne de commiseration , c'est qu'il est , d'une grande prosperité , tombé en ce precipice , non tant par sa faute , que par le mauuais traitement de ses ennemis. Que faisons-nous autre chose , sinon que de représenter à nos yeux , la misérable condition des choses humaines , quand nous auons pitié du calamiteux estat d'un Prince particulier ? Quelle cruauté est-ce à nos ennemis , que de ceux qu'ils ont rendu misérables , ils ne veulent pas toutesfois souffrir qu'on ait commiseration de leur misere ? Certes si on considère cela comme il faut , nous trouuerons qu'en l'exemple de ce Prince , il y va

de nostre faict; & semble que ce soit vn preiugé pour tous les Rois. Car s'il est vne fois permis aux Catholiques d'extirper les Princes Heretiques, ceux-cy croiront qu'ils en peuuent faire autant des Princes Catholiques. La Religion & la dignité de l'Estat, se soustiennent l'une l'autre, d'un secours mutuel; & par vn bon accord, font vne tres douce harmonie. Toutesfois elles ont toutes deux leurs droits distincts, & chacune est renfermée dans ses propres limites. Car il n'est pas permis à l'Estat de violer la Religion, ny aussi à la Religion, de renuerfer l'Estat. Quiconque nie cela, semble taxer Iesus Christ, lequel ordonne qu'on rende à Cesar ce qui est à Cesar, & à Dieu ce qui appartient à Dieu. On peut donc de tout cela voir plus clair.



qu'en plein midy , qu'à tort & iniustement on blasme le Conseil du Roy ; comme si au prejudice de la Religion , il adheroit aux Heretiques.

A V S S I qui est celuy pour impudent & effronté qu'il puisse estre , qui ostant blasmer la Reyne Mere du Roy , ou bien reuoquer en doute sa Picté ? Ne fût-ce pas elle , qui Espouse de cét invincible Monarque , H E N R Y I V. dissipa, comme vn Soleil, les tenebres de sa mort à iamais deplorable ? Ne fût-ce pas elle , qui en la minorité de Louys le Iuste , garantit sa Personne & son Estat, de toute sorte de danger ? N'est-ce pas en fin cette grande Princesse, qui par vne si feconde & si Illustre lignée , a fait que ceux à qui nous estions auparauant en mespris par ce

manque, ont aujourd'huy sujet d'en-  
uier nostre bon-heur ?

Q V E dirons-nous de ce grand Cardinal de la Rochefoucault, lequel imite ou plustost surpasse, tous les anciens Peres, en innocence de mœurs, en grauité, en integrité de vie; & lequel nous pouuons dire, n'auoir iamais fait, ny dit, ny creu, que choses dignes de tres-grande louïange ? & faudroit certes que ceux-la l'accusassent d'impieté, qui s'imaginent que le Conseil du Roy fauorise les Heretiques.

E T quant à cét autre grand Cardinal de Richelieu, à qui ils en veulent principalement, ils ne peuuent pas nier au moins, qu'il ne soit vn tres-excellent Theologien, & que dès son adolescence, il n'ait esté tenu pour vn Oracle en cette profession;  
comme



comme aussi il s'est rendu celebre par sa Pieté, & par tant de Doctes escrits qu'il a mis en lumiere contre les Heretiques, au grand auancement de l'Eglise. Qui est-ce qui ne l'a encore en admiration, pour la prudence & sagesse de ses Conseils; n'en recherchant point d'autres preuues que ce qu'il a contribué à la signalée victoire que le Roy a gagnée sur les Rebelles en cette bataille Nauale? Et ses ennemis n'ayants à dire autre chose contre luy, pour penser ternir sa gloire, le blasment de ce qu'il est trop accort, trop preuoyant; & que tenant ses intentions cachées, il decouure celles d'autrui. En fin nous nous éjouïssons avec la France & avec vous, ô grand Cardinal, de ce qu'on voit, par vostre prudence incomparable, que ceux qui s'estimoient seuls

50      *Declaration du Clergé,*  
estre sages, & qui nous prenoient par  
cy-deuant pour des gents volages,  
barbares, grossiers, & imprudents,  
nous tiennent aujourd'huy plus ac-  
corts & plus preuoyants qu'ils ne nous  
estimoient: Chose qui ne vous est pas  
moins à honneur, qu'elle est auanta-  
geuse au public.

C'EST OIT aussi chose tres-iuste,  
qu'on ne blasmaſt pas Monsieur le  
Chancelier, de cela seul qu'il doit à  
son merite tout l'auancement de sa  
fortune: & c'est pourquoy toutes  
les loüanges qu'on ſçauroit donner à  
la vertu meſme, luy ſont iuſtément  
deuës.

P E V T - O N dire d'ailleurs que  
Monsieur le Mareſchal de Schom-  
berg fauoriſe les Heretiques; lequel  
n'a pas eſté ſeulement cauſe de la  
guerre qu'on leur a faite, mais qui



*Contre certains Libelles.* SI

exerçant la charge de grand Maistre de l'Artillerie, a tant de fois hazardé sa vie, que feu Monsieur le Duc de Mayenne, que les Huguenots appelloient leur Boucher, le tenoit par la main lors qu'il fut blessé d'une arquebusade, dont il mourut, autant à nostre regret que ce coup fatal donna de joye aux ennemis de l'Eglise?

SEROIT-IL encores croyable, que tant de Lumieres qu'il y a en France, que tant de personnes si Illustres par leur Noblesse, si recommandables par leur érudition, si celebres par leur Pieté, si capables par leur longue experience, si zelez enuers leur Patrie, & si affectionnez à la conseruation de l'autorité Royale; Seroit-il, dy-je, croyable que les Heretiques Rebelles que ces gents-la ruinent par leurs armes, ils les assistassent de leurs

conseils ; & que lors qu'ils persecutent l'Herésie en France à feu & à sang , ils la secourussent de leurs moyens , és pays estranges , à leur ruine & confusion ? Y a-t'il effronterie des ennemis , qui ostant blasmer vne si grande innocence ? Vaines sont donc les pensées de ces hommes estourdis , qui croient que nostre aveuglement soit tel , que nous approuuions vne si manifeste calomnie , & que nous pensions que des choses si fausses , & si artificieusement inuentées à la ruine de toute la Chrestienté , soient capables de nous émouuoir.

M A I S se faut-il émerueiller s'ils blasment ainsi le Conseil d'un Prince tres-Chrestien ? Sont-ils pas iniustes , de reprocher au Roy , qu'il fauorise l'herésie , au mesme temps qu'il foudroye & met en poudre par ses Ca-



nons les villes des Heretiques? Luy-  
dy-je, qui est Prince tousiours victo-  
rieux, qui ayme la Religion, sans hy-  
pocrisie, qui est graue sans fast, qui  
est seuer sans cruauté, qui est benin  
sans adulation, qui est genereux sans  
ambition, & qui est prudent sans ca-  
uillation? C'est luy qui a entrepris  
vne guerre si difficile contre la faction  
des Heretiques, que les Rois ses pre-  
decesseurs estimoient ne deuoir estre  
attaquez: que des Personnages re-  
marquables par leur prudence & par  
leur zele à la Religion, croyoient  
qu'on ne pouuoit vaincre par les ar-  
mes: Neantmoins par vne resolution  
admirable, & par vn heur indicible,  
il les a assiegez, il les a emportez, &  
les a vaincus. A ce compte, quand sa  
Majesté fait la guerre aux Heretiques,  
elle se rend fauorable à l'heresie; &

lors qu'elle tasche de l'extirper en son Royaume, elle s'offre de la protéger aux nations Estrangeres. O ingrat François, qui ne peux souffrir la gloire qui est iustement deuë à ton Roy ! O mal habile Theologien, qui es si amy de l'heresie terrassée, que tu declames contre celuy qui l'a mise en si pireux Estat ! Cependant donc que le Roy mesprisant les delices de sa Cour, excite ses subiets au trauail, non tant par son commandement, que par son exemple ; cependant qu'il veille dans ses armées, & qu'il combat à la teste des siens ; cependant qu'il court fortune dans les trenchées ; cependant qu'il assiege les villes des Heretiques, qu'il ruine leurs forts, qu'il defait leurs troupes, qu'il restablit les Prestres dans les Eglises ; cependant qu'il rappelle la Religion en tant de Villes & de



Prouinces , qui en auoit esté si long temps exilée, & qu'il la rameine comme par la main ; Cependant , dy-je, qu'il fait tout cela, faudra-t'il que par l'insolente licence des meschants, & par les Libelles seditieux des ennemis, il ne tire autre fruit de tant de travaux, que d'auoir encouru la haine des Estrangers, le mépris des siens, le desdain d'un chacun ; & qu'il ne porte que les marques d'une vicillesse auant la saison ?

CE seroit toutesfois peu de chose, de luy rauer vne gloire qu'il a acquise en seruant Dieu par tant de travaux, si encore vne si grande innocence n'estoit tacitement menacée de quelque mal, non par les Heretiques seuls à qui il fait la guerre, mais par les Catholiques mesmes , pour le salut & conseruation desquels il veille assi-

56      *Declaration du Clergé,*  
duellement. Car à quelle fin & à quel  
dessein met-on si souuent en auant la  
mort de HENRY LE GRAND,  
laquelle a esté si fatale à la France, &  
si funeste à toute l'Europe? Fait-on  
cela à autre intention, que pour ani-  
mer les meurtriers des Rois, & espou-  
uanter sa Majesté, afin que ce qu'elle  
sçait auoir esté cruellement commis  
en la personne de son Pere, elle ap-  
prehende mesme que cela ne puisse ar-  
riuer à la sienne propre? Pourquoi  
est-ce qu'il renouuelle cette calamité  
publique, sinon afin que par la me-  
moire d'un si tragique spectacle, il  
r'ouure vne cicatrice qui estoit dé-  
ja consolidée par l'heureux regne de  
son successeur? Il semble qu'ils cher-  
chent leur ioye en nostre douleur, eux  
qui peut-estre n'ont peu se contenir  
de rire en cette desolation publique.

Certes



Certes on diroit que ces gens la ressemblent à des Lyons rauissants, qui ayants égorgé & deuoré leur proye, leschent le sang dont ils ont encore leurs machoires teintes : & ainsi prennent double plaisir de leur cruauté. Mais, ô bon Dieu ! ils ne rafraichissent pas seulement la memoire d'un si horrible assassinat, mais encore ils sont si impudens qu'ils disent qu'il est arriué par vn iuste iugement de Dieu : Ainsi ils defendent vne mort, la cause de laquelle ils soustiennent auoir esté iuste. Ils nous font voir clairement par cela, quelle est leur mauuaise volonté en nostre endroit, attribuant à la Iustice de Dieu, vn coup si execrable : Car qui eust peu defendre cét horrible parricide, que celuy qui est capable de l'auoir commis ?

POVRTANT, SIRE, c'est à  
h

vous qui estes le plus grand Roy de la terre, de ne mépriser pas moins les iniures de vos ennemis, qu'il est du deuoir de tous tant que nous sommes d'Ecclesiastiques en France, de prescher par tout vostre Pieté, de louer vostre zele enuers nos Autels, & de procurer le salut & la conseruation de vostre Personne, puis qu'en son Sacre nous auons solennellement iuré d'estre ennemis de vos ennemis. P V I S S I E Z-vous donc, ô grand Roy, continuer heureusement, & poursuiure vostre pointe courageusement : Puissiez-vous toujours regner pacifique, & voir tout humilié à vos pieds : Que les ennemis s'éleuent, que la Calomnie se déborde, que les blasphemes foudroyent; Nous ferons par l'ardeur de nos Vœux, que vous serez conserué, que vous serez victorieux, &




que vous triompherez de tous : Nous priérons Dieu, par nos oraisons continuelles, qu'il vous enuoye son secours des saincts lieux, qu'il exauce vos prieres, qu'il se souuienne de vostre sacrifice ; qu'il fortifie vostre Conseil, & que tous nous vos tres-humbles subiects, nous-nous éjouïssions en vostre salut, & nous magnifiions en nostre Seigneur, & en la prospérité de vostre Majesté.

Q V A N T à ce qui regarde ces Libelles, nous auons trouué bon de les condamner par nostre iugement, comme meschants, impies, & tramez à la ruïne del'Estat. C'est pourquoy nous les auons condamnés & condamnons comme Liures seditieux, & contenant plusieurs choses contre la pureté de la Foy, contre la tranquillité publique ; & lesquels par-

60 *Declar. du Clergé, contre cert. Libell.*  
tant doiuent estre en execration à tous  
gents de bien. D O N N E' à Paris en  
l'Assemblée Generale du Clergé de  
France, le 13. Decembre, 1625.

Par le commandement des Illustrissimes & Re-  
uerendissimes Cardinaux, Archeuesques, Eues-  
ques; & de tous les Ecclesiastiques Deputez en  
l'Assemblée Generale du Clergé de France.

LEONOR D'ESTAMPES, Eue-  
sque de Chartres.





---

*Extraict du Priuilege du Roy.*

**P**AR Lettres Patentes du Roy, données à Fontainebleau, le 4. Septembre, 1625. Signées, S A V A R Y; Il est permis, pendant cinq ans, à ANTOINE ESTIENE, Imprimeur ordinaire de sa Majesté; Outre les trois liures des Edicts du Clergé, déjà publiés, d'imprimer encor tous les autres Edicts, Lettres Patentes, Arrests, & autres choses concernant les affaires du Clergé de France; qui luy seront par cy-apres baillées par les Agents Generaux dudit Clergé: Auec defenses à tous autres, de les Imprimer, alterer, vendre, ny distribuer d'autre impression que dudit ESTIENE; à peine de mille liures d'amende, confiscation des exemplaires; & de tous despens dommages & interests.

